

09-20 Hrs

<><><><><><>

Headlines

- उपराज्यपाल मनोज सिन्हा हुंदी कश्मीर महिला संगठन केडब्ल्यूडी कन्नै मलाटी, आखेआ जे अज्ज नारी शक्ति जम्मू कश्मीर दे हर क्षेत्र दे विकास च बधी चढ़ियै योगदान देआ करदी ऐ।
- मुख्यमंत्री उमर अब्दुल्ला होरें आखेआ ऐ जे गुलमर्ग ते पहलगाम जनेइएँ महत्वपूर्ण सैलानी थाहरें पर बैठकां लाने दा मकसद लोकें अंदर बैठे दे डर-त्राह गी दूर करियै उंदे च बसाह भरसे ते सुरक्षा दी भावना पैदा करना ऐ।
- जम्मू कश्मीर विधानसभा दे स्पीकर होरें बक्ख-बक्ख हाउस पैनलें लेई मिंबरें दी घोषणा कीती, 6 कमेटीएँ दी अध्यक्षता सत्ताधारी विधायक ते 3 दी बिरोधी घड़ें दे विधायक करगन।
- बॉलीवुड अभिनेत्री हुमा कुरैशी नै कल सुचेतगढ़ दा दौरा लाया, बन्ने कन्नै लगदे इलाकें दे बसनीकें नै मलाटी कीती ते उत्थें तैनात बीएसएफ महिला कर्मिण दी दलेरी दी सराहना कीती।
- मौसम विभाग नै जम्मू कश्मीर दे बक्ख-बक्ख हिस्से च अज्जै थमां 31 मई तगर बरखा ते अंधी झखड़ झुल्लने दे असार दस्से न।

<><><><><><>

LG-Women Org.

उपराज्यपाल मनोज सिन्हा होरें कल राजभवन श्रीनगर च उनेंगी मिलने आए दे “कश्मीर महिलासंगठनेकेडब्ल्यूडी दे इक प्रतिनिधिमंडल कन्नै गल्लबात कीती। उपराज्यपाल होरें महिलाएं दे सशक्तिकरण लेई कम्म करने आले, संगछन दे हर इक मिंबर दी सराहना कीती ते आखेआ ऐ जे जम्मू कश्मीर केन्द्र शासत प्रदेश दी तरक्की ते खुशहाली च नारी शक्ति अपना शानदार योगदान दिंदी आवा करदी ऐ। उपराज्यपाल होरें आखेआ जे भारतीय संविधान नै महिलाएं ते पुरुषें गी बरोबरी दे अधिकार दित्ते दे न ते दौनें गी राश्ट्री तरक्की ते खुशहाली लेइ अपना पूरा योगदान देना लोड़चदा ते समाज गी बी महिलाएं ते पुरुषें, जागतें ते कुड़िण बश्कार कोई फर्कोफर्की नेई करनी लोड़चदी। उनें महिला संगठन गी ओहूदे भविष्य दे कम्में लेई शूाकामनां बी दित्तियां। एहूदे शा पैहले संगठन दे सदस्यें उपराज्यपाल होरें गी महिलाएं दे सशक्तिकरण लेई उंदे आस्सेआ कीते जा’रदे जतनें दे बारे च तफसीली जानकारी बी दित्ती।

<><><><><>

CM-Gulmarg Meet

मुख्यमंत्री उमर अब्दुल्ला होरें कल आखेआ जे गुलमर्ग ते पहलगाम आली सैलानी थाहरें इक दे बाद इक केई बैठकां लाना, लोकें अंदर बसाह् भरोसा पैदा करियै उंदे मनै च आतंकी हमलें दे बाद बैठे दे डर—त्राह् गी खत्म करना ते लोकें गी कश्मीर औने लेई प्रेरत करना ऐं गुलमर्ग च कल इक उच्ची सतह् दी बैठक दी अध्यक्षता करने दे बाद उनें एह् गल्ल आखी.....

“दिल ना उम्मीद नही, नाकाम ही तो है, लम्बी है गम की शाम, मगर शाम होती है” उर्दू दिऐं इनें पंक्तिऐं दा हवाला दिंदे होई मुख्यमंत्री होरें कठन हालात च बी उम्मीद ते सकारात्मक सोच रखने दे महत्व गी उजागर कीता। पहलगाम आतंकी हमले दे बाद, सैलानिएं लेई बंद रखी गेदिएं किश सैलानी थाहरें दे मुद्दे बारे गल्ल करदे होई उमर अब्दुल्ला होरें आखेआ जे ऐसिएं 48 थाहरें गी परतियै खोलने बारे बड़ी संजीदगी कन्ने सोच बचार चलै करदा ऐ।

<><><><><><>

Mortal Shell

जम्मू शैहर दे बाहरले इलाकें नरवाल दी ट्रांसपोर्ट नगर थाहर शिड़क दे कंडे त्रै लाईव मोर्टार शैल लब्भे। आकाशवाणी जम्मू संवाददाता दी रिपोर्ट मूजब एह् शैल मकामी पुलस नै कल गश्त दरान दिक्खे। शैल लब्भने मगरा इलाकें दी घेराबंदी करी लैती गेई ते सरबन्धी नियमें गी बपनाया गेआ। बम्ब नकारा करने आले दस्ते गी मौके आली थाहर पर भेजेआ गेआ। इस दल नै इनेंगी नकारा बनाई दित्ता। एह् शैल इत्थें कियां पुज्जे, इस गल्ला दी जांच कीती जा'रदी ऐ।

<><><><><><>

Speaker

जम्मू कश्मीर विधान सभा दे स्पीकर होरें 9 हाउस कमेटी दा गठन कीता ऐ। इंदे चा त्रै नियम कायदे ते विधानसभा दे कम्मकाज गी दिक्खगंन। आकाशवाणी जम्मू संवाददाता दी रिपोर्ट मूजब सत्ताधारी नैशनल कांफ्रेंस दी अगुवाई आला गठबंधन 6 समितिएं दी अध्यक्षता करोग जिसलै के बाकी त्रै दी अध्यक्षता विपक्ष गी सोंपी गेई ऐ। सत्ताधारी गठबंध च नैशनल कांफ्रेंस दे 4 विधायकें गी 4 समितिएं दा ते कांग्रेस ते सीपीआई(एम) दे इक—इक विधायक गी इक—इक पैनल दी अगुवाई सोंपी गेई ऐ।

<><><><><><>

JMC-World Env. Day

जम्मू नगर निगम 5 जून गी विश्व पर्यावरण दिवस पूरी शिद्दत कन्ने मनाने लेई तैआरी च ऐ जिस दरान पूरे शैहूरे च केई सारे कार्यक्रमें ते गतिविधिएं दा सरिस्ता कीता जाग। इस बारे जानकारी सांझी करदे होई निगम दे कमीशनर डॉ. देवांश यादव होरें दस्सेआ जे पूरे शैहूरा च लोक इस महत्वपूर्ण ध्याड़े गी मनाने लेइ किट्ठे होन ते एह्दे महत्व गी समणन, एह्दे लेई बड्छे पैमाने पर हीलें कीते जा'रदे न। इस ब'रे लेई विश्व पर्यावरण दिवस दा विषे सार च मुख्त तौरा पर ध्यान प्लास्टिक कन्नै होने आले प्रदूषण पर रोक लाने ते इसी टकोह्दा करियै दरयाए तलाएं ते होरने जल स्रोतें दे संपर्क च औने थमां रोकने पर दिक्ता जा'रदा ऐ जेह्दे लेई बड्छे पैमाने पर लोकें गी जागरूक कीता जा'रदा ऐ।

<><><><><><>

Huma Suchetgarh(byte)

बॉलीवुड अभिनेत्री हुमा कुरैशी होरें कल संजा जम्मू दे आर.एस.पुरा सेक्टर दा दौरा लाया। उनें आपरेशन सिंदूर दरान बीएसएफ दी महिला कर्मिं आस्सेआ निभाई गेदी भूमका दी सराहना कीतीं बीएसएफ महिलाएं कन्नै गल्ल करदे होई उनें आखेआ.....

सैलसफा निदेशालय जम्मू आस्सेआ चलाई जा'रदी इक श्रृंखला तैहत मन्ने परमन्ने दे लोक जम्मू दा दौरा करगंन ते सशस्त्र बलें ते मकामी लोकें कन्नै इक जुटता जाहर करगंन। इस गैह् दा मकसद खित्ते च सैलसफा गी बढावा देना बी ऐ। आकाशवाणी जम्मू संवाददाता दी रिपोर्ट मूजब इस्सै जतन तैहत कल अभिनेत्री हुमा कुरैशी होरें आर.एस.पुरा दा दौरा लाया। अपना समर्थन ते शांति, रमानदारी ते मेद दे सनेए गी लोकें च फैलाया ते मकामी लोकें कन्नै इक जुटता जाहर कीती।

<><><><><><>

ITI Kisht Applications

आईटीआई किश्तवाड़ नै 15 बक्ख-बक्ख कोर्स च दाखले लेई ऑनलाइन दरखास्तां मंगियां न जिंदे च इलैक्ट्रीशियन, कोपा, स्टेनोग्राफी, प्लम्बर, वेल्डर ते मकैनिक दे सिखलाई कोर्स शामिल न। संस्थान दे प्रिंसिपल अनूप शर्मा होरें बेरोजगार ते गैर सिखलाई प्राप्त नोजवानें गी आखेआ ऐ जे ओ इनें कोर्स च दाखला लेइयै हुनरमंद बनन तां जे ओ कम्म रोजगार हासल करने दे काबल बनन। कोस्र करने दी इच्छेआ रखने आले मेदवार अधिकारिक वैबसाइट राएं अर्जी देइ सकदे न।

<><><><><><>

Udhampur Kabaddi

युवा सेवा ते खेड्ड सरबंधी मैहकमा उधमपुर आस्सेआ 14 ते 17 ब'रे थमां हेठ दी उमरी आली श्रेणी तैहूत मिनी स्टेडियम उधमपुर च जिला सतह दी इंटर जोन ते अंतर स्कूल कौड्डी प्रतियोगिता दा सरिस्ता कीता गेआ। इस कार्यक्रम दा ओपचारिक उद्घाटन उधमपुर दियां डिप्टी कमीशनर सलोनी राय होरें कीता। किट्ठे गी संबोधत करदे होई उनें सारे प्रतिभागिएं गी शुभकामनां दित्तियां ते इस आयोजन लेई मैहकमे दी सराहना कीती। खेड्डें गी समाजी मुद्दें कन्नै जोड़ने दी गल्ला पर जोर पांदे होइ उनें इस प्रतियोगिता गी नशा मुक्त भारत अभियान कन्ने जोड़ने दी सराहना कीती।

<><><><><><>

Weather

मौसम विभाग नै अगले किश दिनें लेई खित्ते च बरखा ते गरज चमक कन्नै कनी कनोज पौने दे आसार दस्से न। आकाशवाणी जम्मू संवाददाता दी रिपोर्ट मूजब अज्ज किश इलाकें च गरज चमक कन्नै बरखा पेई सकदी ऐ। मौसम विभाग नै आखेआ ऐ जे 30 थमां 31 मई बश्कार जम्मू कश्मीर दी मती सारी थाहरें पर हल्की थमां दरम्याने दर्जे दी बरखा पेई सकदी ऐ। किश इलाकें च बरखा ते धुल भरोची दी अंधी बी चली सकदी ऐ।

<><><><><><>

PTC Announcement

आकाशवाणी जम्मू दे क्षेत्रीय समाचार एकांश आसेआ कठुआ जिले लेई अंशकालिक संवाददाता यानि पीटीसी लेई दरखास्तां मंगियां गेइयां न। इच्छुक आवेदक जेहदी उमर 24 थमां 50 ब'रें दे बश्कार ऐ ते ओह कठुआ जिले दा रौहने आह्ला ऐ, इस लेई आवेदन करी सकदा ऐ। मेदवार कश पत्रकारिता च पी.जी डिप्लोमा, डिग्री या कुसै बी पंजीकृत यूनिवर्सिटी थवां ग्रैजुएशन ते पत्रकारिता च 2 ब'रें दा तजुर्बा होना लोड़चदा ऐ। मेदवार गी कम्प्यूटर पर खबर बनाने ते मीडिया कवरेज दे अनुभव सने सरबंधत लोड़चदे उपकरणें वगैरा दा इस्तेमाल करना बी औना चाईदा। आवेदक जिला सदर दफ्तर दी 10 किलोमीटर दी हद्द दे अंदर-अंदर रौहदा होना चाईदा ऐ। दरखास्त ते लोड़चदे दस्तावेजें दी कॉपी मेदवार गी क्षेत्रीय समाचार एकांश आकाशवाणी जम्मू कश पंजीतीर्थी 15 जून 2025 थवां पैहले-पैहले आइए दस्ती जमा करोआनी होग। इस बारै व्यापक जानकारी आकाशवाणी दी वेबसाइट www.newsonair.gov.in पर उपलब्ध ऐ।

<><><><><><>